

Kanton Sarajevo
Skupština Kantona Sarajevo
Zastupnica SDA u Skupštini Kantona Sarajevo
Admela Hodžić

Sarajevo, 24.06.2019. godine

Kanton Sarajevo
Ministarstvu pravde i uprave

ZASTUPNIČKA INICIJATIVA

U skladu sa članom 213 Poslovnika o radu Skupštine Kantona Sarajevo ("Službene novine Kantona Sarajevo broj: 41/12,15/13, 47/13, 47/15 i 48/16), podnosim inicijativu Ministarstvu pravde i uprave Kantona Sarajevo za uspostavu "Registra novčanih kazni" prekršajnih naloga izdatih od strane Službi općinskih inspekcija svih devet općina Kantona Sarajevo.

OBRAZLOŽENJE

Neophodno je obezbijediti uspostavljanje „Registra novčanih kazni“ za Službe općinske inspekcije na nivou Kantona radi uvezivanja u jedinstveni registar novčanih kazni, zbog evidencije postupka, praćenja i kontrole o plaćanju izdatih prekršajnih naloga.

Svim organima uprave, između ostalih općinama, je ostavljeno da osmisle vlastite obrasce prekršajnih naloga, Ministarstvu pravde i uprave KS dostave iste na odobrenje, te zatraže i dobiju brojeve za potrebni broj naloga i štampanje istih.

Ovo je već urađeno u većini općina u našem kantonu. Nekoliko općina je izvršilo i uvezivanje u sistem što je neko vrijeme i funkcionisalo. Zbog poteškoća na koje se u primjeni istih naišlo, odustalo se od istih a nastavljeno je sa podnošenjem zahtjeva za pokretanje prekršajnog postupka.

Općinski inspektori, kako komunalni tako i urbanističko-građevinski, imaju problem kad je u pitanju sankcionisanje prekršaja, pristupu, ažuriranju, praćenju uplata novčanih kazni, te brisanju kazni. Jednom riječju inspektori nemaju kontrolu i uvid u daljnji postupak stranke nakon izricanja prekršaja i ništa ih ne spriječava da isti prekršaj ponove više puta. Također, ništa ih ne spriječava da ostvare neko drugo pravo u istoj ili drugoj općini iako nisu platili kaznu po prekršajnom nalogu. Postavlja se pitanje koja je uopće svrha ovakvog jednog postupka bez mogućnosti kontrole.

Naime, Zakon o prekršajima Federacije BiH („Službene novine Federacije BiH“ br: 63/14) predvidio je da ovlašteni organ (između ostalih i inspektor) sam propisuje novčanu sankciju za počinjeni prekršaj putem prekršajnog naloga, a da inspektor podnosi sudu Zahtjev za pokretanje prekršajnog postupka samo u slučaju da prekršajni nalog nije moguće izdati.

U članu 54. stav. 2 spomenutog Zakona stoji:

„Prekršajni nalog može se izdati samo u slučajevima kada odgovarajući zakon ili drugi propis određuje fiksnu novčanu kaznu, kada novčana kazna može biti izračunata korištenjem matematičke formule, ili kada mjerodavno tijelo odluči izreći minimalnu novčanu kaznu, odnosno zaštitnu mjeru u najkraćem trajanju, određenu takvim zakonom ili drugim propisom.“

A član 53. stav 2. kaže:

„Zahtjev za pokretanje prekršajnog postupka će se podnijeti samo u slučajevima kada ne postoje uvjeti za izdavanje prekršajnog naloga određeni u članu 54. ovog Zakona.“

Kantonálni inspektori izdaju prekršajne naloge zahvaljujući činjenici da rade u okviru Uprave za inspekcijske poslove koja je organizovana na funkcionalnom principu, Inspektori su u ovom slučaju jednostavno dobili prekršajne naloge, koje po potrebi popunjavaju, uručuju stranci odgovarajući broj primjeraka i predaju isti na protokol, odnosno na daljnju proceduru koju provode lica zadužena za unos u Registar novčanih kazni, te kontrolu da li su izvršena plaćanja po prekršajnim nalogima, ako jesu brišu iste iz Registra.

Moguće rješenje bi bilo da općine Kantona Sarajevo zajedno sa Kantonom koordiniraju i dogovore neko zajedničko rješenje, jer je vrlo teško očekivati da su općine pojedinačno u stanju riješiti ovaj problem. Naime, kako nam je poznato, da bi se ostvarilo uvezivanje u Registar novčanih kazni, neophodna je posebna informatička oprema i softver, te obezbjeđenje vrlo rigoroznih bezbjedonosnih uslova za pristup registru, te posebnu prostoriju u koju bi bio dozvoljen pristup isključivo ovlaštenoj osobi.

Admela Hodžić
